

AKASHVANI AIZAWL

REGIONAL NEWS BULLETIN

HEADLINES (MORNING)

1. Ramchhunga state hrang hrang Goods and Services Tax dinhmun tarlanah Mizoram GST chu nikum 2025 March thla chhunga khawn aain za zela 39 in a pung.
2. Aizawl Municipal Corporation huam chhung Ward 19-a Corporator inthlanna naktuk Thawhlehni a vote thlak tur atana inbuatsaihna engkim peih fel a ni tawh.
3. Ningani-a inthlang tur West Bengal leh Tamil Nadu Assembly inthlan campaign hin a vawrtawp a thleng tan
4. South Korea President Lee Jae Myung chuan ni thum cham turin nimin tlai khan India a lo thleng.

<><><>

GST

Ramchhunga state hrang hrang Goods and Services Tax dinhmun tarlanah Mizoram GST chu nikum 2025 March thla chhunga khawn aain za zela 39 in a pung.

Ministry of Finance tarlan danin India ram chhiah khawwna atan July 2017 atangin GST hman anih hnuah rampum huapa GST khawn chu a pun belh zel a, nikum 2025 March thlaa GST nena khaikhinin a punna chu za zela 8.8 a ni a, India ramin kumin 2026 March thla chhunga GST chhiah a khawn zat chu cheng vbch nuai 2 chuang niin kumin February thla khawn zat cheng nuai 1 sing 8 sang 3 zaruk pakua aain cheng vbch sing 1 sang 6,455 in a tam zawk a ni.

Ministry of Finance tarlan danin nikum September 22 atangin Goods and Service Tax (GST) chhiah thil chi hrang 375 ah tih hniam a ni a. In chhung bungrua leh khawsak relna chi hrang hrang atanga motor lam chi thlenga GST rate hi tih hniam leh thil thenkhat phei chu chhiah lak lohna rate 0% a tih hniam a ni.

Sawrkar tangka kum kalta kum 2025-26 chhung khan Mizoram GST khawn hi a tlahniam nasa hle a, kumin february ah -24% niin January ah 0% a ni a, sawrkar kum kalta chhung khan GST khawn hi kum 2025 August leh September bakah kumin January leh thla liama March thla tih chu a Minus vek a ni.

(Desk)

<><><>

MUHCS

Mizoram Universal Health Care Scheme(MUHCS 2.0)-a inziah luh theih hun pawhsei a nih hma April ni 15 thleng khan mi 31,671 an inziaklut tawh.

Mizoram State Health Care Society (MSHCS) Chief Executive Officer (CEO) Dr Lalhriatzuali Ralte hnen atanga Akashvani Aizawl News thudawn danin, kumin February ni 16 atanga tun thla April ni 15 tlai dar 3 thleng khan MUHCS 2.0 hnuaiiah hian online leh offline kaltlangin mi mi 31,671 an inziaklut tawh a. Chung zinga mi 31,333 te chu online kaltlanga inziaklut niin, mi 338 te chu offline a inziak lut te an ni a. MSHCS Ceo Dr Lalhriatzuali Ralte chuan mipuite chu MUHCS a inziah luh hun tawp ni May ni 15 chu bawhpel lo turin a chah a, hemi hnu hi chuan la inziaklote tan grace period an hawng tawh dawn lo tih a sawi a ni.

Mizoram sawrkarin a ruahmanna hmasaah chuan kumin February ni 16 atanga tun thla April ni 16 thleng khan MUHCS 2.0 hnuaiiah man chawia online-a in ziah luh hun hawn a ni a. Tun thla April ni 1 atang khan MUHCS 2.0 hi a taka hman tan niin, April ni 2 atang khan Internet that lohna khua 269-a health sub centre-ah te offline hmanga inziah luh theihna hawn tan a ni baw a. Hetihlai hian Ningani liamta khan Mizoram sorkar chuan MUHCS-a inziah luh theih hun hi thla thar May ni 15 thleng a pawtsei a ni.

MUHCS 2.0-ah hian cheng 2,500, cheng 5,000 leh cheng 10,000 te a inziah luh theih a ni a. Hei hian chhungkaw khat tan cheng Nuai 5 hu thleng man chawi lova inenkawlna a huam a, sorkar hnathawk

nghet zawng zawng chu inziah luh ngai loin an tel sa a, an hlawh atangin thla tin pawisa an thawh dawn a, Civil Pension leh AB-PMJAY (Golden Card) hmangte tan pawh a hranpaa inziahlulh ngai loin, MUHCS-ah an tel sa bawk a ni.

<><><>

CIVIC POLLS

Aizawl Municipal Corporation huam chhung Ward 19-a Corporator inthlanna naktuk Thawhlehi a vote thlak tur atana inbuatsaihna engkim peih fel a ni tawh.

State Election Commissioner Dr. H. Lalthlangliana'n a sawi danin Polling Party zawng zawngte tukin zingah an duty na hmun pan turin an inruahhman fel vek tawh a, hemi hma lam hian kum upa leh damlo chaklo zual vote thlakna hmun pan thei lote tana a hmuna pan chilha vote thlakna (Home Voting) ruahhmanah vote 2,594 a tla tawh a, election duty puala vote thlakna siamah vote 1,328 thlak lo ni tawh bawk a ni. Naktuk hian zing dar 7 atanga tlai lam dar 5 thleng vote thlak hun hawn a ni dawn a, ward 19 a polling station 257-ah electronic voting machine (EVM) hmanga vote thlak a ni dawn a ni.

AMC inthlanna tura vote nei awm zat chu hmeichhia nuai 1, sing 2, sang 9 leh 656 leh mipa nuai 1, sing 1 leh 333 an ni a, an vaiin vote nei hi mi nuai 2, sing 3, sang 9 leh 989 an awm a, mipa ai hmeichhia an tamna chu 19,323 a ni. Vote awm tamna ber chu ward 18-na niin, vote 18,906 an awm a. A tlemna ber ward 8-na-ah vote nei mi 7,975 an awm thung. AMC huam chhungah hian hian a veng bil ang a vote tamna ber chu ward number 2-na huam chhunga Bawngkawn Veng a ni a, vote 6,442 an awm a ni.

State Election Commissioner Dr H. Lalthlangliana chuan, Vote thlaktuten tuma chim buai lova zalen taka rilru an hman theih nan Silent Period puan a nih thu sawiin, Political Party te tan hun rei tak campaignna hun hawn ani tawh a, vote thlak dawn hnaite hi chu Voter te chan pual, an duhthlanna felfai an siam theihna atana inbuatsaih hun anih avangin Voter te chanvo liau liau-a a ni a ti a. He hun hi ti buaia campaign tum talh chu dan bawhchhiatna a nih bakah Voter-te zah lohna a ni a ti. Voter-te pawhin anmahni hmin tuma la campaign ru fo te chu Voter te zahlohna, anmahni ngaineptu an ni tih hrethiama an lo dawnsawn loh thiam a ngai a ni a ti a. Political Party zawng zawng te chu Silent Period ngai pawimawha voter chanvo zahthiam turin a ngen a ni.

<><><>

CYMA

Central YMA Road Monitoring Committee chuan kawngpui siamna hmasawna duhawm tak an hmu chu lawmawm an tih thu an sawi.

Central YMA Road Monitoring Committee chuan tunhnai khan Sairang leh Vairengte inkar leh Kawnpui leh Sihphir inkar kawng siam mek an endik a, kawngpui siamtu Contractor zingah Sairang - Buichali leh Kolasib - Bilkhawthir inkar kawng siamtu J-Infratech hmasawna chu beisei aia a muan thu an sawi a. J-Infratech hotute chu nasa zawka tanla tur leh Ni khatah hnawthawh hun hnih siam a, darkar 16 zel ni tin thawk turin an hrilh a ni.

Kawnpui leh Sihphir inkar kawng siam mek an endiknaah BRTF hotute leh Contractor-ten an ngenna ngaipawimawha, theihtawpa tan an la chu lawmawm an tih thu Central YMA hruaitute chuan an sawi a. Kawngpui siam mekin a nghawng avanga kawng khuar chhe lutuk lai hnawh tura an tihte pawh, tha taka an lo hnawh chu lawmthu an sawi a, kawngpui chu siam hmabak a tam tawh loh avangin tha tak leh chang taka thawk zo thuai turin BRTF hotute leh Contractor-te chu an chah a ni.

(Desk)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Wawiin chawhnu dar 2 leh a chanve-ah Chanchinthar puan leh a ni ang.

<><><>

PAMRA

Peace Accord MNF Returnee Association (PAMRA) chuan inremna thuthlung anga zalenna sualtu hnam Sipaiten an chanvo an chan theih nan hmalak an rel.

PAMRA hian inrinni khan District tina PAMRA hruaitute ko khawmin, MZP Conference Hall-ah meeting an neihpui a. Kum 1986-a MNF leh India Sorkar-in inremna thuthlung an ziah anga zalenna sualtu hnam Sipaiten an chanvo an chan tur wawiin thlenga la hlawhtling lo chu a tihlawhtlin ngei theih nan

Mizoram Sorkar-ah hmalak chhunzawm zel ni se, an ti a. Remna thuthlung anga haw Hnam sipaite chan tur chu an ngen leh nawr ngai tawh loin Sorkar-in ngaihtuah sak tawh turin an ngen a ni.

PAMRA thukhawm chuan MNF leh India Sorkar-in inremna an ziah chu a kum 40-na (Ruby Jubilee) hmel an hmu mek a, heti chung a vawiin thlenga an chanvo chang tura nawr a la ngai chu pawl an tih thu an sawi.

(Desk)

<><><>

CAMPAIGN

Ningani-a inthlang tur West Bengal leh Tamil Nadu Assembly inthlan campaign hin a vawrtawp a thleng tan a. BJP senior leader leh Prime Minister Narendra Modia chuan niman khan West Bengal-a vantlang inkhawm hrang hrangah thu a sawi. Pu Modia hian Jhargam, Purulia leh Bishnupur district-ah te a campaign a. West Bengal-a BJP an sawrkar chuan double engine sawrkar chakna hmangin hmeichhiaten hlakna tam tak an dawng dawn a ti a. Hmeichiate himna, zalenna leh hausakna chu an party ngaih pawimawh anih thu a sawi. TMC hruaitu leh West Bengal Chief Minister Mamata Banerjee pawhin Hooghly district-a Tarakeswar leh Bardhaman district a Kalna ah thu a sawi a. BJP chu an state ah sawrkar anih chuan TMC sawkarin hamthatna a lo siamte an nuaibo sak vek dawn niin an sawi a ni.

Congress, Left leh party dangte pawh hmun hrang hrangah an campaign mek bawh a ni.

Tamil Nadu ah pawh inthlan hma campaign hun reilote la awmah party tinten theihtawp chhuahin an campaign a. Senior BJP leader leh Union Minister Amit Shah leh Rajnath Singh-a te chuan state chung hmun hrang hrang tlawhkualin thu an sawi a.

Congress leh DMK te chu hmeichiat chanvo hauhsakna women's reservation dodal ah an puh a ni.

Hetihlai hian Congress hruaitu Mallikarjun Kharge pawhin Hosur ah thu a sawi a. Sawrkarin bial siambelh a tumna delimitation bill chu opposition party leh ruling te vote thenhran a tumna niin a puh a ni.

(Newsonair)

<><><>

SOUTH KOREA PRESIDENT

South Korea President Lee Jae Myung chuan ni thum cham turin niman tlai khan India a lo thleng a. Tun tum hi a vawi khat rawn zinna a ni a. A nupui Kim Hea Kyung bakah Minister leh official ten an rawn tawiawm a ni. Vawinah Prime Minister Narendra Modia leh President Lee Jae Myung te hi New Delhi-ah an inkawm dawn a. Hruaitu pahnihte hian India leh South Korea thawhdunna hrang hrangte an sawidun dawn a. Hei bakah hian khawvel thil thleng pawimawhte an sawidun bawh ang. President Lee Jae Myung hian President Droupadi Murmu-i pawh a kawm dawn bawh a ni.

(Newsonair)

<><><>